

LIS PREDICJIS DAL MUINI

di pre Josef Marchet - Udin, 1965

Barufe cul plevan

O ai cjatât da dî cul plevan. Cun dut il rispiet pes sacris che o ai simpri, usgnot mi è capitade la volte di bati i pugns sul taulin. O vevi tacât, cun dute la polegane, il discors sul cont di cheste vile che, di doi agns in ca, no à fregul di assistance religjose: dome une messute ogni tant, par gracie di cualchi predi di passaç che nol po cognossi la clime dal paîs; e... lis tabaiadis di Vigj Scuete, che al è un biât dalmenâr. Al mi à rispuindût che Gargagnà di 'Sore nol merte di plui: dute int ledrose, buine dome di criticâ e di pensâ mâl di ce che si cîr di fâ par lâur incuintri; fameis mâl imbastidis, barufis par ogni cjase; fruts bandonâts pes stradis a incarognîsi; ignorance e tristerie e un grum di pretesis; e plui di un marcandali, che se al viôt a passâ un predi i sberle daûr insolencis. O ai dite che al è vêr, ma che al po ancje dipendi di cheste mancjance di un cuintripês che salacor al podarès dreçâ la balance: a son un grum di agns che a Gargagnà di 'Sore no si viôt une tonie di predi che si interessi di chestis fameis, di cheste canaie bandonade... Puar pre Scjefin al rive sù sgrasaiant come il camion di Toni Fari, al dîs la sô messute cun cuatri peraulis su la glorie dal paradîs e al spessee a tovâse pes curtis, par no che cualchidun i vadi dongje a contai lis sôs duliis (parcè che chei di Gargagnà a vadin dal predi dome quant che a crodin di podê gjavai cualchi palanche o cualchi raccomandazion o cualchi plasê pai lôr interès). Si sa che la jerbate e cres di viole, se nissun la sgrame fûr.

Alore il plevan al à tacât a invelegnâsi: al à dite che se o vin voie di vê alc di plui e di miôr, o podìn lâ in curie, domandâ un capelan e meti lis mans inte sachete par dai almancul une bocjade; che Gargagnà, dopo dut, nol è un paîs di tante miserie che no si puedi fâ saltâ fûr une sedon di mignestre o une sclese di companadi par un capelan. Lui - al à dite - a 'nd à fin avuâl dai vôi cu la vile di 'Sot: dutrine, azion catoliche, asilo, zoventût, la glesie di ingrandî, la canoniche di meti in sest che e je une landri, e cent mil pinsîr, che nol sa nancje dulà petâ il cjâf. E po - al à dite - Gargagnà di 'Sore nol è insom il mont, e se la int e à dibisugne di alc, e po ancje discomodâsi a rivâ in plêf: dopo dut a son sedis, disesiet minûts di strade.

Jo o ai provât a mutivâ che ancje ca sù a son malâts e viei e fruts piçui e feminis imberdeadis inte voris; e che stant abàs no si po cognossi dutis lis situacions e dibisugnis e rognis e pasticș... E lui mi à stropade la bocje e comandât di tasê: al mi à dite che di chest al è responsabil lui e la autoritât le à lui. In chês volte mi è vignude sù un fregul di fote e i ai rispuindût a fuart che nol stes a vignî fûr cu la sô autoritât: l'autoritât e je une robe che plui si la

dopre e plui si la fruie: come la suele des scarpis, che cul plui cjaminâ si finîs cul restâ cence. Al è miôr resonâ e cirî il cjaveç che no taiâ la ace cuntune fuarpeade.

O crodevi che al ves vût di sfulminâmi, e invezit al si è bonât di colp e al mi à dite che usgnot al pensarà ce che si po fâ e doman al vignarà sù a dî messe, e di chê bande us fevelarà, e dopo messe si fermarà par sintî ce intenzions che o veis e cemût che la pensais, par viodi se si po cumbinâ alc. Cussì o seis visâts: pensait sù ancje voaltris e tignît a ments che se o molais cheste ocasion, cui sa mai se us indi capitarà une altre.

La messe e sarà aes vot e mieze. E cun cheste us doi la buine sere.

